

Segundë cartë nabëquë'ë San Pedro

Quëquë'ë Pedro lu ra shmënë Dios

1 Na Simón Pedro, nahia tubi muzë nu poshtë shtë Jesucristo. Quëquë'a'a cartë rë' lu të narialdí ldu'i shti'dzë Dios. Por tubi favurë shtë Dios naná justë nu por Jesucristo, Salvador shtë hia'a, bënë të recibir mizme fe nadapë na'a. Chulë quërelde të por shti'dzë më igual ziquë lë'ë na'a. ²Gulë bënë recibir zihani favurë shtë Dios nu gulë cuedchí ldu'u të mientras tsagla'guë runguë bë'a të lë'ë Dadë Dios nu Jesús Shláma'a.

Ra shmënë Jesús verdaderë

³Bëne'e Dios grëtë' bendición parë gápa'a tubi vidë za'quë delante lu më, tubi vidë naná de acuerdë con voluntá shtë më. Nadápa'a bendición ni purquë runguë bë'a hia'a el quë nagulë lë'ë hia'a según pudërë nu milagrë ru'bë shtë më. ⁴Por tubi favurë shtë më, bëne'e më diza'quë nalasac. Bënë më prometer zihani cusë ru'bë. Por mizme di'dzë ni nadápa'a vidë shtë Dios. Guc salvára'a. Hia adë quërelde'núdi'ia'a cusë mal ziquë deseo mal nananú la'ni ldu'u mieti por galërzebi ldu'u mënë. ⁵Napë

të bendición nabënë më prometer, rialdí ldu'u të shti'dzë më; iurní runë tucarë guëquërelde të ziquë gubani Jesús, lu buen conductë gulë gac mënë nasini guëqui'. ⁶Despuësë de ni, adë rdé'edi'il sí parë deseo mal nananú la'ni ldú'ul. Hia despuësë de ni, gulë gac më pacënci; lu pacënci gulë gapë rëspëti parë Dios, ⁷Nu lu rëspëti parë Dios, gulë gapë cariñi parë ra shmënë Jesús nu gulë gapë llëru'bë amor parë grë mënë, hashtë ra narná tushë lul. Grë ndë'ë gulë bënë cumplir con guëdubínú ldú'ul. ⁸Si talë tsagla'guë guëquërelde të de acuerdë con cunseju rë', hiadë gáquëdi'i të nabëchi sino másru'u gunë të cumplir shchi'ni Dios. Másru'u gápël tubi vidë za'quë ziquë tubi hiaguë nardë'ë zihani nashi. Iurní guená mënë másru'u runguë bë'a të Jesucristo Shláma'a. ⁹Perë el quë nadë rianáldëdi'i tēchi ra cusë rë', adë riasédi'ill. Nall ziquë ciegu. Bëa'ldë ldú'ull de quë bëzunë më almë shtë'nëll de grë duldë nabë'nëll antsë. ¹⁰Por ni rnía'a lu të, bëchi, gulë bënë segurë de quë Dios gulë më lë'ël, de quë guna'bë më lë'ël parë gáquëll shmënë më. El quë narunë cumplir

ra cusè nagunia'a la'ni cartè rè', jamàs adè gáquèll bajo ordè shtë duldè ¹¹nu tsutèll con lègrè catè rnibè'a Dios ziquè Rëy parè siembrè. Jesucristo Shláma'a gúni' recibir lè'èl parè cuezènul lè'i'.

¹²Por ni tsagla'guè rnia'a lu tè grè cusè rè' aunquè hia nané tè, nu na tè firmè lu verdá nanapè tè. ¹³Lluá'ahia naza'què guènehia cunsèju parè lè'è tè mientras nabania tè parè adè guèa'ldèdi'i ldu'u tè enseñansè rè'. ¹⁴Dadè shtë hia'a, Jesucristo, bèlua'a mè na de què mërè gatia. ¹⁵Por ni gapa cuidadè tè parè rac guèagná ldu'u tè enseñansè rè' cualquier iurè despuèsè gatia.

Pedro gunáhi' pudèrè shtë Cristo

¹⁶Adè guanáldèdi'i na'a tèchi ra cuendè narni'i mènè sulè por llgabè nadè rlluí'idi'i shtë rall. Bèlua'a na'a verdá lu tè lla bédchini Jesucristo con pudèrè. Na na'a testigu napè mè pudèrè parè guèribè'a mè ziquè rëy. Con prupi slu na'a guná na'a pudèrè nu llni shtë mè. ¹⁷Guná na'a iurè lè'è Dios Shtëda'a bédè'è mè hunurè nu pudèrè parè shini mè Jesús, nu bédchini tubi bè dizdè gube'e catè rabtsè'è llni. Ni tubi nápèdi'i di'dzè parè guèní'ill lla na lugar ni. Lè'è bè guni'i: "Ndè'è na shinia narac shtua'a; nalé rquitè ldua'a lè'i'". ¹⁸Lè'è na'a bini na'a bè nabédchini dizdè gube'e purquè dzulezènú na'a lè'è Jesús guèc dani catè Dios santu biadí'dzi'.

¹⁹Perè ra di'dzè nabèquè'è muzè shtë Dios guahietè parè lè'è hia'a, más segurè nahin què testimonio shtëna; nu quèhunè tè bien si talè

rdè'è tè cuendè lo què narni'i di'dzè ni ziquè rdè'è tè cuendè tubi llni narzianí lu nacahi. Gulè bédè'è cuendè hashtë rdzè guèdchini, hashtë guèdchini llni shtë mè nu tsasè tè ra di'dzè rè'. ²⁰Primèrè gulè bédè'è cuendè de què grè ra di'dzè naná bèquè'è muzè shtë Dios, escritè nahin la'ni Sagradas Escrituras, perè ni tubi chu tsasè pè runè cuntienè di'dzè ni, sulè por Espíritu Santo tsasèl pè runè cuntienin, lédèdi'i por llni nanápèl. ²¹Purquè ni tubi muzè shtë Dios biadí'dzèdi'i' shti'dzè Dios por mizmè voluntá shtë muzè ni, sino biadí'dzi' por pudèrè shtë Epíritu Santo naná quègsè lè'è rai'.

Ra mèsè bishi

(Judas 4-13)

2 Guahietè nanú profetè bishi ladi ra mènè israelitè. Zni rac guèdchini ra mèsè falsè entrè lè'è tè. Guèlua'a rall lla'chi enseñansè falsè nardè'è fin parè fe shtë mènè, hashtë gunè rall negar Jesús, de què gúti' parè gac salvára'a. Zni cagna'bè rall cashtigu guèc rall; nasesè gac condenar rall. ²Zihani mènè tsanaldè tèchi vidè mal shtë mèsè ni. Guèni'i rall nezè za'què shtë Dios nahin bishi. ³Rzebi ldu'u rall dumí; quègsiguè rall lè'è tè con enseñansè falsè, sulè parè guèdè'è tè dumí ca'a rall. Dizdè tiempè guahietè guni'i mè gac cashtigu rall, gac condenar rall; nasesè guèdchini juici shtë Dios guèc rall.

⁴Dios adè bènèdi'i perdunè ra ianglè nabè'nè duldè guahietè sino què bètia'a mè lè'è rai' la'ni gabildi. Bèsè'au lè'è rai' lu nacahi parè

cuezè rai' dzè shtë juici. ⁵Nu zac bé'nèdi'i Dios perdunè gué'dchiliu tiempè shtë Noé, sino què bèshe'ldè mè tubi juici shtë nisè subrè guéc ra mènè mal; perè bè'nè mè salvar Noé con gadchi shfamíli'. Noé gúqui' muzè shtë Dios naguadi'dzè shti'dzè mè lu ra mènè. ⁶Nu Dios bé'ni' condenar; bëzalú mè ra gué'dchi Sodoma nu Gomorra. Bèshe'ldè mè gui'i hashtë bëac dè ra gué'dchi tè parè grè ra mènè mal naze'dè despuèsè, guená rall nu guèdè'è rall cuendè nadzè'bè na juici shtë Dios. ⁷Perè bè'nè mè salvar Lot, tubi nguii za'què nu nalé riashac ldú'i' iurè gunáhi' vidè dzabè shtë mènè mal. ⁸Lot nguii za'què lu Dios, guquèrèldèll entrè ra mènè mal; nalé guá ldú'ull iurè gunáhi' maldá nabè'nè mènè. Bíni' pè guni'i rall lu sa' rall. Dzè la gue'lè guzac zi ldú'i' purquè guquèrèldè mènè sin ni tubi règlè. ⁹Dadè Dios nápi' pudèrè tè gapè mè ra mènè za'què lu grè cusè mal tè ldáguèdi'i mènè lu duldè; nu napè mè pudèrè cutsa'u mè mènè mal parè tsa rall lu cashtigu shtë juici.

¹⁰Gunè Dios cashtigu grè mènè mal, ra narianaldè tèchi deseo mal, cumè ziquè ra naquèrèldè ziquè mbecu, nu gunè mè cashtigu grè ra nanédi'i guèzu'bè diaguè shti'dzè el què narnibè'a. Mènè ni fier na rall nu adè rdzébèdi'i rall lu Dios; rni'i rall cuntrè el què nanapè más pudèrè què lè'è rall. ¹¹Perè ra ianglè nanapè más fuersè nu pudèrè què ra nguii ni, adè nápèdi'i rai' valurè guèdchi'bè rai' demandè cuntrè ra narnibè'a. Napè ra ianglè rèspesti lu Dios.

¹²Ra hiumbèrè rè' na rall ziquè ra mè nardé'èdi'i cuendè. Quèhunè rall cumplir mal deseo nananú la'ni ldu'u rall. Destinadè na rall parè galguti. Mènè ni runè rall burnè ra cusè nadè riasédi'i rall, perè guènitì rall con grè mal deseo nanapè rall. ¹³Gunè rall sufrir mizmè manèrè cumè bè'nè mènè sufrir por causè shtë rall. Rquitè ldu'u rall grè ra dzè tsagla'guè rall tèchi cusè mal. Na rall ziquè manchè fier lu lari; rquitè ldu'u rall por deseo mal nananú la'ni ldu'u rall. Rsigné rall mènè mientras raunú rall lè'è tè lidchi tè.

¹⁴Rzebi ldu'u rall ra na'a mal; adè rdzáguèdi'i rall quèhunè rall duldè. Rsigné rall ra nanádi'i firmè lu shnezè Dios con bishi. Bè'nè rall gan zihani dumí tantè rzebi ldu'u rall dumí. Na condenadè rall. ¹⁵Bènitì rall purquè bèru'u rall nezè za'què shtë Dios. Guagla'guè rall mizmè duldè nabè'nè Balaam, shini Beor. Balaam guc shtú'ull gúnèll gan dumí por maldá. ¹⁶Perè tubi burrè gu'pè, guni'i ma guéc Balaam por duldè naquèhunè Balaam. Guni'i ma ziquè rni'i tubi mènè nu bédè'è ma fin galètuntè shtë profetè ni.

¹⁷Ra nguii rè' na rall ziquè tubi guèrzú nanápèdi'i nisè, nu ziquè shcachi narua'a mbè. Na condenadè rall parè tsa rall lu más nacahi catè guèquèrèldè rall parè siempèrè. ¹⁸Rni'i nadchini rall. Con di'dzè nadè rlluf'idi'i rsini rall sa' rall lu duldè. Rni'i rall napè mieti permisi gunè mieti duldè; znì rsigné rall mènè nanapè du'pè tiempè dizdè bèru'u rall lu enseñansè falsè.

¹⁹Quëhunë rall prometer libertá por enseñansë shtë rall, perë mizmə lë'ë rall na rall bajo ordë shtë mëdzabë purquë cadë nguui na ziquë esclavë shtë cusë narnibë'a lë'ë nguui.

²⁰Parë ra mënë nabënguë bë'a Dadë Jesús; hia bëru'u rall nezë mal catë rzë mënë shtë gué'dchiliu, si talë guëabré nguui lu cusë mal; si talë guëazë guetë nguui nezë shtë Jesucristo Salvador shtë hia'a, fin shtë nguui ni na peor quë antsë. ²¹Mejurë parë nguui ni adë nianédi'll nezë za'quë shtë Dios quë despuësë tsutëll nezë ni, adë tsaglá'guëdi'll tēchi mandadë nabëdë'na'a recibir de Dios santu. ²²Nahin ziquë narni'i tubi dichë; verdá na di'dzë ni: "Lë'ë mbecu bëabré dchibë shtë ma ldu'u ma; nu lë'ë guchi nagualú guzë, bëabré guaguezë ma la'ni benë stubi".

Guëabré Jesús stubi

3 Lë'ë tē narac shtua'a, ndë'ë na segundë vësë quëquëa'a lu tē. Guërupë cartë gunia'a lu tē cusë de quë hia nané tē. Rac shtua'a adë guëá'ldëdi'i ldu'u tē ra enseñansë sino gapë tēhin la'ni ldu'u tē.

²Gulë bësëagná ldu'u tē ra di'dzë naguni'i ra muzë santu shtë Dios guahietë, nu gulë bësëagná ldu'u tē mandamientë shtë Dadë Jesucristo, Salvador shtë hia'a. Gulë bësëagná ldu'u tē di'dzë shtënë më naguni'i na'a lu tē. Na na'a poshtë shtë më.

³Primërë puntë nané hia'a de quë la'ni lúltimë dzë guëdchini mënë nagunë burnë ra cusë sagradë; guëbani rall según deseo mal nananú la'ni ldu'u rall. ⁴Guëna'bë di'dzë rall: "¿Pë fin napë promësë

shtë Cristo de quë guëabré më stubi? purquë dizdë guti ra shtadë guélú hia'a, grë cusë riagla'guë igual cumë dizdë bëcue'shtë Dios gué'dchiliu". ⁵Adë rac shtú'udi'i rall gac bë'a rall de quë nanú gube'e nu gué'dchiliu dizdë tiempë guahietë. Bëntsa'u mëhin por shti'dzë më, nu por mandadë shtë më gulú më gué'dchiliu la'ni nisë nu nanú nisë alreodedurë guiu'u. ⁶Lë'ë gué'dchiliu dzë ni gualú. Grë guiu'u né'azë la'ni nisë. ⁷Perë gube'e nu gué'dchiliu nananú iurne', na destinadë parë cashtigu shtë gui'i por mizmə mandadë shtë Dios. Lë'ë gui'i guëza'i gué'dchiliu dzë shtë juici. Guëza'in con grë ra mënë mal. Tsalú grëtë' rall.

⁸Bëchi narac shtua'a, adë rëá'ldëdi'i ldu'u tē de quë parë Dadë Dios tubi dzë na ziquë tubi mili izë, nu tubi mili izë na ziquë tubi dzë. ⁹Dadë Dios quëac ldë'di'i parë gúni' cumplir shti'dzë më ziquë runë llgabë bëldá mënë, sino quë Dios napë më pacënci parë lë'ë hia'a. Adë rac shtú'udi'i më tsagnítia'a, ni tubi de lë'ë hia'a, sino rac shtu'u më grë ra nguui guëabré ldu'u rall con lë'ë më nu gunë nadzë'ë rall mudë nanabani rall.

¹⁰Dzë naguëabré Dadë Jesús, guëdchíni' ziquë rdchini tubi nguba'në gue'lë, iurë adë nádi'il segúrël. Iurní lë'ë gube'e tsalú con tubi ruidë dushë. Grëtë' ra cusë narná hia'a lu gube'e tsalú rahin con gui'i, nu gué'dchiliu tsequi lu gui'i con grë lo quë nananú luhin.

¹¹Nané tē grëtë' ndë'ë napë quë gac cumplir; tsaluhin; por ni rqui'ni gac tē më santu, mënë naquëhunë

cumplir shti'dzë më. ¹²Mientras cuezë të dzë naguëdchini më stubi, gulë bë'në cumplir voluntá shtë Dios të guëdchini më lueguë. Dzë ni gube'e tsalú; tsaluhin con gui'i juntë con cusë nananú lu gube'e tsequi; gac cambin lu be'lë. ¹³Perë lë'ë hia'a dzuléza'a gube'e cubi nu tubi gué'dchiliu cubi naná bë'në Dios prometer dizdë antsë. Lugar ni guëquérélda'a; ndë nanú purë cusë za'quë; grëhin gac justë.

¹⁴Por ni lë'ë të narac shtua'a, mientras quëbezë të grë ra cusë rë', gulë gapë mizmə lë'ë të parë guëdzələ më lë'ë të sin ni tubi faltë, sin ni tubi cusë mal. ¹⁵Gulë bēdē'ë cuendē de quë pacēnci nanapë Shláma'a, runin parë gac salvar mēnē. Zni también bëquē'ë Pablo, bécha'a, el quë narac shtu'u hia'a lē'i'. Bëquē'ëi' mizmə di'dzë ni lu

të según llni nabēdē'ë Dios guéqui'. ¹⁶La'ni grë ra cartë nabëquē'ë Pablo, nanú partë naganë parë riasë hia'a. Nanú mēnē nadë rac bē'adi'i nu adë nádi'i rall firmë lu shnezë ra Sagradas Escrituras. Caglú rall guëc shti'dzë Dios. Zni rua'a rall grë ra Sagradas Escrituras. Tsalú rall por lo quë naquëhunë rall.

¹⁷Por ni lë'ë të narac shtua'a, hia quë nané të grë ra cusë rë', gulë gupë mizmə lë'ë të. Adë tsaldídi'i ldu'u të bishi shtë mēnē nadë rzu'bë diáguēdi'i shti'dzë Dios; adë rdé'ēdi'i të sí tsanaldë të tēchi rall nu guëazë guetë të shnezë Dios. ¹⁸Mejurë gulë bēsē'dē di'dzë shtë Dadë Jesucristo Salvador shtë hia'a, nu gulë bë'nē recibir más favurë shtë më. Cha guédé'na'a alabar lē'ë më iurne' nu parë siemprë. Amén.